

# JU,S Submete Rekursu Iha TDO Ba Kazu RD, Pena Tinan 12 La Refleta Proporsionalidade Ba Kazu Abuzu Sexual

[neonmetin.info/buletin/2022/01/10/jus-submete-rekursu-ih-tdo-ba-kazu-rd-pena-tinan-12-la-refleta-proporsionalidade-ba-kazu-abuzu-sexual/](https://neonmetin.info/buletin/2022/01/10/jus-submete-rekursu-ih-tdo-ba-kazu-rd-pena-tinan-12-la-refleta-proporsionalidade-ba-kazu-abuzu-sexual/)

January 10, 2022



## Reportajen Zevonia Vieira

JU,S submete iha loron 6 Janeiro 2022 rekursu iha kazu RD no husu Tribunál Distrital Oe-cusse (TDO), atu tetu filafali pena tanba iha pozisaun katak pena ka kastigu tinan 12 kma'an liu haree prátika Tribunál rasik iha Timor-Leste no la reflète proporsionalidade ba kondenadu nia sala no prevensaun jerál ba abuzu seksuál iha ita-nia sosiedade.

Iha komunikadu imprensa ne'ebe Neon Metin asesu, JU,S esplika katak JU,S hatene seidak iha prátika iha Timor-Leste, atu submete rekursu iha lezadu nia naran, maibé tuir ami-nia interpretaun, lei klaru – Kódigu Prosesu Penal no padraun direitu internasionál – katak iha situasaun balun vitima ka lezadu bele duni submete rekursu. Ami espera katak Tribunál Rekursu sei konsidera rekursu hosi lezada. Iha rai CPLP sira hotu lezada sempre iha kompeténsia hodi halo rekursu no iha Kódigu Prosesu Penál mós prevé kapasidade ba ema ne'ebé iha interese iha kazu atu halo rekursu. Lei iha Timor-Leste la limita rekursu iha kazu krime ba arguidu no Ministériu Públiku.

*“Tuir ami-nia pozisaun, Tribunál la tetu ho loloos fatór oinoin atu determina proporsionalidade kastigu ka pena. Tribunál iha Oecusse fó folin maka'as liu ba otas hosi arguidu no nesesidade atu arguidu bele hetan resosializasaun filafali ba sosiedade, duké pena ne'ebé justu ba arguidu nia krime no proporsional hodi hatudu prevensaun jerál ba abuzu seksuál hasoru menor”,* esplika parte JU,S iha komunikadu imprensa.

Tribunál oinoin iha Timor-Leste bainbain hatuur kastigu todan duni ba ema sira komete abuzu seksuál ba menor. Iha prátika tribunál, pena tinan 12 fó bainhira vítima ida de'it no komete krime ida ka rua.

Importante fó-hanoin katak Tribunál Oecusse konsidera provadu katak arguidu halo duni abuzu seksuál ba menor na'in 4 liuhusi koitu vajinal no/ka oral, ne'ebé komete durante besik tinan 10. Labarik ne'ebé inan-aman ka familia konfia ba arguidu hodi tau-matan ba no ikus arguidu uza labarik sira-nia vulnerabilidade hodi halo abuzu ba sira.